



Minggu, 03 April 2022
Ogen: Esekiel 33:21-22



Nggejapken Kuasa Tuhan



Enggo lit kira-kira sepuluhdua tahun bangsa Israel i bas pembuangan Babel, kuta si labo pernah iarapkenna ringan i je. Tupung i bas pembuangan e Esekiel lanai beluh ngerana. Labo erkiteken ia sakit tapi Tuhan si erbahansa ia lanai beluh ngerana. Ibahan Tuhan bage gelah enggo ngadi ia nuri-nuri kerna kai si ate Tuhan ibahanNa man bangsa Israel. Enggo bias perkatan-perkatan si arah lebe, enggo mbue Tuhan ngerana arah Esekiel gelah min bangsa e robah. Tadingkenna min dibata-dibata palsu, ulanai ipenalemna bangsa-bangsa si deban lako nampati ia, perobahina min lagu langkahna si meluat. Enggo lalap ipersingeti Esekiel tapi lalap la robah. Ulihna bangsa e itamaken Tuhan ku Babel jadi bangsa tawanan. Erkiteken si e, lanai i bahan Tuhan Esekiel beluh ngerana.

Tapi kenca 12 tahun i bas pembuangan, igejapken Esekiel lit kuasa Tuhan erdahin bas kulana. Si erbahansa beluh ka ia ngerana. Igejapna Esekiel kuasa e karaben ope sekalak dilaki reh ndahi ia. Kalak e lompat i Jerusalem nari, ibabana berita kerna kuta Jerusalem si enggo italuken bangsa Babel. Kota e runtuh, ras rumah pertoton pe runtuh. Tupung berita e ibegi Esekiel, lanai ia pekak, enggo beluh ia ngerana. Esekiel la ngasup nulak perbahanen Tuhan e i bas dirina. Saja, megermet ia kai si jadi, arah ia enggo ka banci ngerana, banci saja enggo lit sura-sura Tuhan si man pesehenken man bangsa Israel.

Kuasa Tuhan la terukuri kita, tapi kai si ibahanNa uga pa pe guna kiniulinnta. Kai pe banci ibahan Tuhan nandangi kita guna nehi sura-suraNa. Si perlu i bas kita nari e me megermet. Banci saja lit resiko si man alanken si la bagi ukur, tapi adi Tuhan si erdahin kai dalinna kita nimbak? Perlu si inget, si ibahan Tuhan e labo erbahansa kita celaka.